

موال

موال عن الصحاب النافع اللي يفق جنبي وأقف جنبه في الشده وفي الأفراح..
صاحب ونافع لصاحبه كل ما شافه يحبه أحس أول ما أقابله أني بلقاه مرتاح..
معايا في الحلوه في المره لا زعلنا من بعضنا مرّه حافض مقام الصداقة نبض قلبه سماح..
صاحب مالوش منفعه ولا له كمان أغراض صاحب ومخلص قوي يحب ليّ الخير
صاحب جميل ومليح صاحب وطبعه مريح لو قلبي لو مفاتيح أنا أسلمه المفتاح.

واصحي يا صاحبي .: ياللي انت جنبي..

بتفك كربي .: وقت اللزوم..

...

واسمع زناتي .: عوض زناتي

دا مصحياتي .: من أحلي نوم..

...

إصحي لأمورك .: تعبر بحورك

وضب سحورك .: عزك يعدوم..

...

جميل في واصلك .: تعمل بأصلك..

لا تقل أصلك .: في أي يوم

...

زناتي المسحراتي

دائماً يا سيدي .: إيدك في إيدي

دم ف وريدي .: تشد إيدي

بتقولي قوم

وأصحي للأصحاب..

ووجد الوهاب..

واصحي يا شلبي .: يا ابن أم شلبي..

بتلبي طلبي .: من غير مطامع..

...

صاحب وفالح .: في الوصل ناجح..

ولالك مصالح .: ولا لك منافع..

...

صاحب جمایل .: لك طبع هایل

دائماً تجاهل .: من غير موانع

...

لو عز ليك .: تندهلي اجيلك

وأشد حيلك .: في عنيه أشيلك

ولا عندي مانع

...

معرفش ليه في الزمان ده مفيش أصحاب ولا ناس ينفعوا دي الوقتي يتصاحبو
ولا صاحب تصاحبه تلاقي فيه الشهامه يضحى عشان صاحبه
صاحبت صاحب وكان صاحب بيغلط وبعد ما يغلط يجيب الحق علي صاحبه
ياعم ياللي ملكش أصحاب تعاله من بكرة أنا وانت نتصاحب..
واللي يصاحبنا عشان المنفعه لا يجلنا ولا نروح له ولا نشوفه ولا نصاحبه..

واصحي للاصحاب..

ووجد التواب..

...

إختار صديقك .: قبل طريقك..

يحرص طريقك .: من الحيتان..

...

ياريت تصاحب .: مش أي صاحب

مالهشي صاحب .: زي الزمان..

...

غدار بصاحبه .: واللي يصاحبه

يتعب له قلبه .: يا شيخ زيدان

...

صيتي وماادي .: دايماً يعدي

ياخد ما يدي .: وبميت لسان

...

زناتي المسحراتي

كذاب وفقري .: يخطف ويجري

لوح لي ضهري .: مالوش أمان

...

صاحب كمثلته .: إزاي توصله

م عمل بأصله .: إقطع له وصله

وإنساه كمان

...

وأصحي للأصحاب

ووجد الوهاب

...

اصحي يا سيد .: يابن أم سيد

يا بو طبع جيد .: بين الصحاب..

...

للقلب واصل .: ومن البواسل

ولا بينا فاصل .: ولافيه حجاب..

...

صاحب مساعي .: للحب داعي..

يا بو قلب واعى .: دائماً شباب..

...

توعد توافي .: تشيك كتافي..

وبقلب صافي .: مفهوش ضباب..

...

زناتي المسحراتي

وأخوك زناتي .: ده مسحراتي..

ومصحياتي .: في كل عام..

...

وفي المجالس .: دائماً ما نس

من غير وساوس .: صاحب تمام

...

بيحب صاحبه .: واللي يصاحبه

يفضل مصاحبه .: علي الدوام

...

واسمع ندايا .: خليك معايا

ماليش هوايا .: غير الهدايا

وفي النهاية..

بقول سلام..

موال

عايزين نكون أصحاب مفيش ما بينا ضباب ولا حقد في النية..

سمن وعسل علي بعض نخاف كمان علي بعض من نسمه معديّه..

والصاحب اللي يكون خوان ومش مضمون ميجليش نواحيه..

دا أنا أحب صاحبي يقف جنبي يسند لي قلبي لو وقع مني..

وأقف معاه في العواصف وأبدله نفس العواطف في الراحه والجايه..

واصحي للأصحاب..

ووجد الوهاب..

